

ita inspiratione tam supercælesti quam cælesti animatur ventus seu aer infimæ mundi regionis, non aliter quam corpus ab anima agitari cernimus: atque iterum ventus sic animatus, est anima meteororum omnium, vnde & à ventis seu aeris portionibus, virtutibus angelicis inspiratis, omnia mundi meteora, tam visibilia quam invisibilia procreantur, verbi gratia, videmus ex ventis non modo centraliter moueri, verum etiam & materialiter ab aere conflare nubes & alia meteora tam lucida quam tenebrosa.

Ex quibus videmus, diuinum spiraculum esse centrale atque internum cuiusque rei mundanæ principium, agens omnium simplicissimum, & primarium, iuxta illud sapientis: *Spiritus DEI incorruptibilis est in omni re, Sap. 2.* huius afflatu mouetur & animatur spiritus seu ventus angelicus, & spiritus aereus iterum à vento angelico, & spiritus itidem elementaris seu æthereus à vento æthereo, & meteora seu imperfecte mista à vento aereo, qui etiam cum suis animabus, empyrea scilicet & ætherea, pellit & mouet composita omnia, quæ nihil sunt aliud, quam meteora spermatica, ad maturitatis perfectionem perducta, quorum est vel retrogrædi in aerem, à quo fuerunt prius, hoc est, à mixtione imperfecta ad simplicitatem, vel ad compositionis perfectæ complementum pergere, mouentibus & mediantibus semper internis, qui secundum ipsorum naturam à voluntate diuina gubernatam, vel ad generationem maturando, vel ad destructionem putrefaciendo & corrumpendo operantur: Obseruamus autem quod spiritus seu ventus increatus spiret diuerse, licet sit spiritus vnus & idem, sic enim ignem eundem videmus agere vel benigniter atque naturaliter fouendo, vel maligniter, hocque aut præternaturaliter desiccando aut calefaciendo nimium, vel contranaturaliter, subiectum totaliter consumendo & comburendo, qui quidem effectus varii sunt, non respectu agentis sed resistentis potius atque male recipientis. Atque hinc est, quod sicut DEVS est primus & principalis in qualibet creatura actus, siue eius intentio sit ad destructionem, afflictionem, & passionum inflictionem, seu ad generationem & beneficentiam prona, ita etiam pro qualibet illarum proprietatum, nomen quidem in sacris literis varium ei attribuitur: Vnde & secundum variam decem sephirotarum Cabalisticarum dispositionem, decem DEO nomina ascribuntur, quæ nihilominus omnia ad duo tendere videntur, videlicet vel ad sæuitiam, quibus peccatores punire, & elementaria pro peccatis hominum corrumpere solet, vel ad benignitatem, vti in discursu nostro super efficientes meteororum causas latius dicitur.

Atque hæc erat causa, quod à sapientibus Græcis Dionysius sit dictus nocturno tempore, in quo dicitur septem compositi partes dilacerare: at vero diurno tempore ipsum Apollinem vocauerunt vtpote qui 7. illas partes iterum construere & generatione reedificare existimatur, quas nocturno tempore sub nomine Dionysii putrefactione defecit: Sed quoniam DEVS existimatur per ordinationem res agere, angeli vero (vtpote eius ministri) per executionem: ideo in profundiori Theosophiæ mysterio versati attribuunt seueritatis suæ executionem ad angelos, Gabrielem Ventis Septentrionalibus præsentem, & Samuelem seu Vriem illos meridionales gubernantem: Vnde fit, vt horum spiritibus effectus mundo præternaturales sapicule produci soleant, quemadmodum in Tractatu nostro *de Anatomia mystica*, vbertim, & in causa meteororum efficiente copiosius explicatum habetis, Clementiæ vero & misericordiæ diuinæ argumenta præbent angeli, Michael in oriente dominium habens, & ab illa plaga spirans beneuolos vitæ & generationis afflatus, & Raphael, cui quartæ occidentalis præsidium attribuitur, vtpote qui in ventos illius plagæ dominium habet, nam Raphael ex sua denominatione denotat medicinam DEI. Ex his autem ventis omnia, dominantibus Archangelis, in mundo sublunari meteora procreantur, siue ad compositi generationis metam pertingant, siue ad simplicem corruptionis terminum retrogrediantur. Nam in centro cuiuslibet spermatis, ventus quidam animans massam spermaticam inflare & tumidam facere cernitur, experientia magistra, quoniam sperma est nihil aliud, quam nubes seu aer inspissatus, vtpote quod non aliter spiritu vitæ centraliter inspiratur atque animatur, atque ad perfectionis punctum mouetur, quam aerem à vento seu spiritu angelico in vaporem, à vapore in nebulam, & à nebula paulatim in densam nubem reduci cernimus, cuius anima coruscans nonnunquam oculis apparet, & quandoque occultatur, tandemque nubis substantia in lapidem durum, operante illo vento fulgureo & formali, migrare animaduertitur. Pari etiam more ad generationem hominis voluntas patris, quæ etiam est ventus, agit animam paternam, deinde ventus animalis, vitalis, & naturalis includuntur in spermate, & tres ampullas ex quib. cor, cerebrum & hepar, suis spirationibus eleuant, intra dies post eiusdem in matricem infusionem paucos, tum ipsum more vesicæ inflatæ paulatim in fœtus effigiem, at tandem in speciem humanam conflare obseruantur. Imo vero & tota hominis vita est spiritus & ventus, cuius est omni momento & inspirare & expirare officium. Nonne à sancta pagina dicitur spiraculum vitæ? Atq; etiam omnis animæ passio, siue violenta & non naturalis, siue sit secundum naturæ leges, est à ventis exagitata; Sic ira, dementia, furor, timor, & huiusmodi alia sunt ventorum procellosorum ac tempestuosorum Microcosmicorum, & quasi Typhonis, Ecnephiæ & Presteris, atque etiam tonitruorum, & terræ motus effectus; huiusmodi etiam sunt inter morbos epilepsia, vertigo, suffocatio matricis, &c. Quod quidem & sapientis testimonio sic